

重修威縣志

第柒册

威縣志卷十

人物志

紀曉嵐謂古地志載方域山川風俗物產太平寰宇記增以人物是爲州縣志書之濫觴元明以後體例相沿夫既以此著爲志書體例矣自不得專重地理如酈道元水經注南懷仁坤輿圖說之類亦不得專重人物如宋張齊賢洛陽緝紳舊聞記明耿定向先賢遺風之類

洛陽緝紳舊聞記本小說家四庫全書沿班史藝文志列子部近人章炳麟謂小說亦史之流據此則亦可列史部矣

蓋必綜舉州縣全部大綱分類記載乃爲得體幾與正史三國志名實相符威縣志分類十四就中有人物志卽本此例茲特析爲上下二篇隸以名臣循吏文學武功忠烈孝義鄉賢隱逸耆舊藝術列女十一門并各表附焉邦人君子緬高曾之矩矱攷故國之文獻倘亦有眷眷不能已於中者乎

人物志上

名臣 循吏 文學 武功 忠烈 孝義

名臣

藥纒者印落落者綬出則乘翹翹車建子子旌同在百爾之列而其名獨赫赫然照汗青史此豈無故而然哉蓋必有豐功大烈高才美政足以饜飫乎人心食其德者自不得不報以名夫豈大冠若箕中無所有日坐政事堂伴人食數碗肉糜者所能倖致乎吾邑先正或樞臣或疆吏大半懋建功伐謹守規範不以謀略自滿不以學問驕人此固由天懷之冲挹亦因風氣之和柔也今者國體變更君臣名詞已爲歷史上之陳迹然而權利義務實相對待權利愈大而義務亦必思所以副之無臣之名有臣之實倘或素餐尸位良心豈無判斷而顧甘令名譽之掃地乎甚或重兵坐擁野心勃勃迫元首下殿而走又或行迹詭秘盜賣盧龍家貲敵國而猶不知止臣之一字固無問題而獨不顧身後名乎吾纂名臣至此不禁爲若輩髮指也

三國

孟康字公休安平廣宗人魏散騎侍郎弘農太守領典農校尉勃海太守給事中散

騎常侍中書令後轉爲監封廣陵亭侯

前漢書叙例

黃初中以與郭后有外屬并受九親

賜拜遂轉爲散騎侍郎是時散騎皆以高才英儒充其選而康獨緣妃嬙雜在其間

故于時皆共輕之號爲阿九康既無才敏因在宥官博讀書傳後遂有所彈駁其文義雅而切要衆人乃更加意正始中出爲弘農典農校尉康到官清己奉職嘉善而矜不能省息訟獄緣民所欲因而利之郡領吏二百餘人涉春遣休常四分遣一事無宿諾時出案行皆豫勅督郵平水不得令屬官遣人探候修設曲敬又不欲煩損吏民常豫勅吏卒行各持鎌所在刈馬草不止亭傳露宿樹下又所從不過十餘人郡帶道路其諸過賓客自非公法無所出給若知舊造之自出於家康之始拜衆人雖知其有志量以其未嘗宰牧不保其能也而康恩澤治能乃爾吏民稱歌焉

魏志

杜畿傳注引魏略舊志
廣平府志均無今補

北齊

陳元康字長猷廣宗人父終德魏濟陰內史元康賞贈度支尙書諡曰貞元康頗涉文史有幹才魏正光中從李崇北伐以功賜爵臨清男普泰中除主書累遷司空高昂記室初司馬子如高季式與孫奉劇飲奉醉死神武命求好替子如舉魏收他日神武謂季式曰卿飲殺我孫主簿魏收作文書都不稱我意司徒嘗道一人謹密是

誰季式以元康對曰是夜能開書快吏也召之一見便授大丞相功曹內掌機密善陳事意不爲華藻封安平子軍國多務元康問無不知神武臨行留元康在後馬上有所號令九十餘條元康屈指數之盡能記憶神武甚親之曰如此人世間希有我今得之乃上天降佐也時趙彥深亦知機密人謂之陳趙而元康勢居趙前性又柔謹神武之伐劉蠡升天寒雪深使人舉氊元康於氊下作軍書颯颯運筆筆不及凍俄頃數紙及出神武目之曰此何如孔子邪神武嘗怒文襄親加毆蹋極口肆罵以告元康元康俯伏泣下霑地曰王教世子過矣神武曰我性急曠阿惠嘗如此元康大啼曰一度爲甚况常然邪神武自是爲之懲忿時忽恚撻輒曰勿使元康知又謂左右曰元康用心誠實必與我兒相抱死文襄入輔居鄴下崔暹崔季舒崔昂等竝被任用張亮張徽纂竝爲神武待遇然皆出元康下神武每與元康久語文襄門外待接之時人語曰三崔二張不如一康文襄家倉頭蘭固成掌厨與其弟阿改謀害文襄因進食置刃盤下而殺文襄元康抱文襄文襄曰可惜可惜與賊爭刀髻解被刺傷重腸出猶手書辭母至夜而終時年四十三明年贈司空諡文穆元康母李氏

以哀死贈廣宗郡君子善藏黃門侍郎隋開皇中爲尙書郎大業初卒元康弟諶官

至大鴻臚次季瓌鉅鹿太守

節北史北齊書本傳

唐

潘好禮貝州宗城人第明經累遷上蔡令治行最擢監察御史坐小累下除芮城令拜侍御史徙岐王府司馬居後母喪詔奪服固辭不出開元初爲邠王府長史王爲滑州刺史好禮兼府司馬知州事王御下不能肅有詔好禮檢督王家過失皆上聞王每遊觀好禮必諫諭禁切農月王出獵家奴羅迺好禮遮道諫王初不許乃臥馬下諍曰今農在田王何得非時暴禾稼以損下人要先踐殺司馬然後聽所爲王慙爲還遷豫州刺史勤力於治清廉無所私子請舉明經好禮曰經不明不可妄進乃自試之不能通怒笞之械而徇於門復以功累徙温州別駕卒好禮博學能論議節行修整一意無所傾附未嘗自列階勳居室服用麤苟至終身

新唐書本傳

宋

范質字文素宗城人父守鄭州防禦判官質生之夕母夢神人授以五色筆九歲

能屬文十三治尙書教授生徒後唐長興四年舉進士爲忠武軍節度推官遷封邱令晉天福中以文章干宰相桑維翰深器之卽奏爲監察御史及維翰出爲節度皆請質爲從事維翰再相質遷主客員外郎直史館歲餘召入爲翰林學士知制誥漢初加中書舍人戶部侍郎周祖征叛每朝廷遣使齎詔處分軍事皆合機宜周祖問誰爲此辭使者以質對歎曰宰相器也周祖自鄴起兵向闕京城擾亂質匿民間物色得之喜甚時大雪解袍衣之且令草太后誥及議迎湘陰公儀注質蒼黃論撰稱旨迺白太后以質爲兵部侍郎樞密副使顯德四年質建議以律條繁冗輕重無據吏得因緣爲奸世宗特命詳定是爲刑統六年與王溥竝參知樞密院事世宗不豫入受顧命恭帝嗣位加開府儀同三司封蕭國公及太祖北征爲六師推戴時質方就食閤中太祖入率王溥魏仁浦就府謁見太祖對之嗚咽流涕具言擁逼之狀軍校羅彥瓌舉刃擬質曰我輩無主今日湏得天子質不知所措乃與溥等降階受命太祖征澤潞幸其第賜黃金器二百兩銀器千兩絹二千匹錢二百萬先是宰相見天子議大政事必命坐面議之從容賜茶而退質等憚帝英睿每事輒具筭子進呈

帝從之由是始廢坐論之禮乾德初進封魯國公質奉表固辭不允二年九月卒年五十四將終戒其子旻勿請諡勿刻墓碑太祖聞之爲悲惋罷朝贈中書令賜絹五百匹粟麥各百石質力學強記性明悟舉進士時和凝以翰林學士典貢部覽質所試文字重之自以登第名在十三亦以其數處之貢闈中謂之傅衣鉢其後質登相位爲太子太傅封魯國公皆與凝同云初質既登朝猶手不釋卷或勞之質曰有善相者謂我異日位宰輔誠如其言不學何術以處之後從世宗征淮南詔令多出其手吳中文士莫不驚伏質性卞急好面折人以廉介自持未嘗受四方饋遺前後所得祿賜多給孤遺閭門之中食不異品身沒家無餘貲太祖謂侍臣曰朕聞范質止有居第不事生產眞宰相也從子校書郎杲求奏遷秩質作詩曉之時人傳誦以爲勸戒有集三十卷通錄六十五卷行於世子旻

節宋史本傳

旻字貴參十歲能屬文以父任右千牛備身累遷著作佐郎宋初判大理正事俄知開封縣太宗時領京尹數召與語頗器重之嶺南平遷知益州兼水陸轉運使俗好淫祀輕醫藥重鬼神旻下令禁之且割己奉市藥以給病者愈者千計復以方書刻

石置廳壁民感化之會南漢知廣州官鄧存忠劫土人二萬衆攻州城七十餘日旻屢出親戰矢集於胸猶激勵將卒殊死戰賊遂少卻病創日篤堅壁固守遣使十五輩求援廣州救兵至圍解賜璽書獎之旻病甚詔令有司以肩輿載歸闕下疾愈通判鎮州有能聲賜錢二百萬遷庫部員外郎開寶九年知淮南轉運事太祖謂旻曰朕今委卿以方面之重凡除民隱急軍需之務悉以便宜從事無庸一一申覆也歲運米百餘萬石給京師當時稱有心計太平興國初爲水部郎中車駕征晉陽上書求從師還加給事中六年卒年四十六有集十一卷邕管記三卷子貽孫官至主客員外郎

同上

魏廷式字君憲大名宗城人少明法學嘗客游趙州舍於監軍魏咸美之廨解有西堂素凶咸美知廷式有膽氣命居之卒無恙來京師咸美弟咸信延置館舍以同宗善待之太平興國五年中第釋褐朗州法曹掾轉運使李惟清以其吏材奏知桃源縣遷將作監丞端拱初改著作佐郎通判潁州淳化二年始命李昌齡判審刑院以廷式明練刑章奏爲詳議官屢進對太宗悅其明辨遷太子左贊善大夫改知利州

李順爲盜就命充陝西至益州路轉運使後入奏事太宗謂曰有事當白中書廷式曰臣三千七百里外乘驛而至以機事上聞願取斷宸衷非爲宰相來也卽不時召對問方略稱旨賜錢五十萬令還任賊平遷知寧州未至召入判大理寺至道初乘傳河朔決獄復出知宋潭二州湖南地土衍沃民喜訟產有根柢巧僞難辯者廷式立裁之吏民咸服眞宗卽位改刑部會王繼恩有罪下吏命廷式同按之踰宿而獄具俄進銀臺封駁司拜右諫議大夫知審刑院咸平二年卒年四十九錄其子舜卿爲太祝禹卿同學究出身廷式所至以嚴明稱剛果敢言爲人主厚遇

節宋史本傳

元

秦起宗字元卿其先上黨人後徙廣平洺水縣曾大父當金季兵起窾山麓爲洞奉其親以居榜窾大洞匿其里中百人閉之具牛酒出待兵兵入索惟見其親屬曰孝士也釋之去里人曰秦父生我起宗生長兵間學書無從得紙父順削柳爲簡寫以授之成誦削去更書年十七會立蒙古學學輒成辟武衛譯史累遷太子家令司典簿官上言東宮官屬輔導德義財賦非所治也朝廷是之遷南臺御史建康多水或

實災而有司抑之或無災而訴災起宗微行得實人以爲神明拜中臺御史劾中丞和尙受人婦人賤買縣官屋不報起宗從臺官入見踞辯久之勅令起起宗不起會日暮出明日立太子有赦起宗又奏不罪和尙無以正國法和尙服辜帝曰爲御史當如是矣又劾閻憲卜咱耳竊父妾以逃其父憤死瀆亂天常流之嶺南自是盡言無諱皆見聽用有御史奏議一卷出爲撫州路總管有司供帳甚盛問其費所從出小吏曰借辦於民遂亟使歸之几席僅給而已自是官府僚佐有宴集成禮卽止因諭衆曰我素農家安儉約務安靜庶使吾民化之居一歲以老去官明年以兵部尙書致仕居一歲卒諡昭肅子四人鈞銓鐸鏞鈞西臺御史

節元史本傳

循吏

何謂循吏顏師古曰循者順也上順公法下順人情也故無論京朝清要州郡守牧與夫令丞簿尉哦松射鴨之末僚但能心心公法念念人情卽爲無玷乎官箴夫法雖萬變而其法法者不變情雖各殊而其情情者不殊古今此法亦古今此情順其法法之法無法不情順其情情之情卽情卽法初何事模稜龔範黃學召擬杜爲哉

元

劉時美洺水人至正間任南宮縣發奸勦寇號爲神君盜賊相戒不入境通志

明

吳瑜由舉人任監察御史孤介鯁直不避強禦陞山東按察司僉事志

高安登正統乙丑科商輅榜進士任行人司行人罔辱君命志

尹言字守忠爲人恬靜寡營不逐時好舒徐容與未嘗有疾言遽色以名孝廉五上

春官未博一第乃投牒銓曹自箴仕以來歷年一十有九爲縣令者二州牧者三郡

丞者一所至修城垣疏河渠諸所厝施厥功甚偉至於冰蘖操持一塵不染垂歿時

家已匱乏室有箱篋扁鑰甚密其子若孫意或黃白也啓之惟故衣書籍而已志

姜允清字懷泉早慧名噪里閭十上棘闈弗售以明經授山東即墨尹巖邑難治允

清不忍以刑督倣古蒲鞭示罰之意民亦樂與休息未期年卽解組歸日以詩文爲

事邑之執經問奇者戶外屢恒滿也年八十猶作蠅頭細書逾數年始卒一時齒德

莫出其右志

卷十

六

北

平
京
津
印
書
局
印

張守樞字旋字以選貢授湖廣永州府司理性素方正居官益復公直不以利害怵志時司道曲庇一令其人素不檢守樞巡部竟案以法人爲守樞危守樞曰得無以我戀戀此五斗米耶乃拂袖歸復補陝西平涼府其執守如前而齟之者益甚遂堅臥林下蠶桂之性至老不渝威人士仰如山斗以爲有王彥方陳太邱之風

志 舊

王法堯字見唐都憲王公濟之裔少以穎異特聞顧數奇困場屋者三十年嗣以明經任山東安邱縣二尹法堯雖壓百僚之底而任事勤慎嘗攝邑篆雅著循聲士民恒祝頌之未幾掛冠歸居鄉醇竺有古人風

志 舊

賈儲芳字瑞堂以伯父太保公邊功恩授臨清鎮撫爲人尙氣節時魏闖擅權荼毒縉紳儲芳蒞任甫月有巨璫馳驛視師勢燄薰天達官貴人莫不屈膝儲芳職應戎服謁見嘆曰陶靖節不爲五斗米拜鄉里小兒余奚戀此一弁爲遂力白長官辭任歸放蕩山水間二十年戊寅東兵陷城不屈而死

志 舊

按戊寅崇禎十一年也考廣平府志是年十二月清兵入雞澤并破清河威縣諸城是時死難者儲芳而外更有王太史建極賈秀才前王馬巡檢如麟與子生員

璠兆李庭柱之父州倅公百戶賈紹庭之妻孫氏增生張國翰之妻李氏此特絳紳之家載在邑乘者耳編戶齊民應難更僕數蓋幾乎一城老幼悉化沙蟲碧血橫飛白骨填巷可謂極天下之至慘矣然則滿洲之兵禍吾威前民實身受之固不獨揚州十日嘉興屠城兩書已也噫嘻

賈傳芳字聚堂以廕授廣東高州府別駕甫二載丁內艱天啓元年起復補青州有異政擢膠州知州時山左白蓮教匪倡亂所在蜂起陷鄒滕諸縣傳芳潛訪爲首姓名居址以計取其渠魁悉置之法而脅從者悉放歸農全活以萬計

舊志參
膠州志

沙蘊金字仲蓼天啓四年舉人早歲失怙事母曲盡色養事長兄如嚴父撫四歲弱弟範金日夜勸課底於成立凡族中不克婚娶者靡不周濟筆耕屢空以道義名節自礪筮仕河南湯陰令湯本南北孔道輪蹄接踵簿書蝟集蘊金理煩治劇恢恢有餘去之日民爲立德政碑孫太師所撰文也擢陞南京上元縣尹遷南京戶部主事以勞瘁卒於任

舊志

劉光字青藜處鄉里姻族恂恂謙退人多愛之以崇禎元年恩貢授山西繁峙令和

易得民心闖賊兵薄城下身率士民登陴固守邑賴保全厥功尤著

舊志

清

高凌雲字君霖生而開敏不類常兒讀書好游俠長補博士弟子員與弟登雲日以詩賦爲業愛名山大川游覽寰區足跡幾遍明末由監選授浙江樂清令未履任遼值鼎革後隨清師入川以功授成都府同知兼攝夔州府篆滇兵犯川夔戍單弱城破被執不屈因削髮乘隙逃歸撫軍奇其節題補江南松江府海防同知政刑寬簡士民愛之所著有南游記怡怡齋聽雨齋存存草等集年七十八歲以疾終於武林雲居寺僧舍

舊志

劉派久字繩顯邑之小劉莊人順治五年舉人知湖南永興縣值吳藩兵圍城派久率兵晝夜捍禦有黨吳者說之降派久曰此吾致命時也益奮勵登城憤極氣塞仆地而死子麟昇檝走兵燹中卒歸葬時謂臣忠子孝

歲輔通志

張建文字彬雅康熙三十八年已卯舉人少孤事繼母以孝聞雍正六年宰河南羅山縣除城中發喪敝規裁納稅餘平額外所加分毫不取致仕後著有知非稿

廣平府志

蘇論崇嘉慶戊辰臚錄官江西吉水縣巡檢緝盜賊禁娼賭農民樂業地方有爭訟者勸諭之士民感悅回籍後儉樸自持邑令以後學模範表其閭

同上

徐瀾字觀濤道光壬辰副榜以州判分發廣西捕獲巨盜上官奇其才丁內艱服闋改發山西任解州州判署理解州事決獄如神升補安邑知縣邑有以健訟著稱者痛懲之一境肅然咸豐三年八月髮逆由河南竄垣曲張觀察奉檄防堵遇害瀾以安邑令兼署猝聞警人情惶駭有議閉城門者瀾謂運垣商賈錯處居民不下萬戶驟禁出入賊未至我先擾矣乃選丁壯繕軍械爲固守計賊知有備遂由絳縣東竄紳商士庶立碑以記其事置長生祿位祀之上官保以知府用丁外艱服滿赴陝西中丞曾望顏倚重之保荐補缺後以道員用是時軍書旁午大吏方倚爲左右手而瀾遽以積勞卒

全上

尙廷俊字碩卿咸豐戊午舉人官江西義甯州知州義甯在萬山中民健於訟日常收訴牒數百紙廷俊隨時判決如疾風之掃秋葉有周鄭兩姓者以爭墓田涉訟自元以來凡五百餘年而讞未定廷俊蒞任兩姓又投控至廷俊咲曰吾爲若了之因

風 集 二
詢以此地吉凶兩姓皆以吉壤對廷俊曰以余觀之則凶壤也且凶之甚兩姓請其故廷俊曰爾輩家貲孰如昔日皆曰不如也廷俊曰固知之訟至五百年控牒之費資斧之費吏役需索之費如恒河沙數實難悉計推原禍始皆此地爲之也凶孰甚焉兩姓聞之皆大感悟皆讓步罷訟案由是結廷俊之折獄其妙於感物多類此解組以後逍遙林泉寄情詩酒著有退省庵詩草

楊錦江字子酉號岫菱夙嗜輿地天文學而於宗教源流有關國故者治之猶審爲秀才時假館授徒課暇恒爲說開鑿蘇彝士運河日月虧蝕八大行星運行狀口講指畫忘寢食同光之交舉國朝野幾不辨此種學說爲何物學子方呢苦制舉文錦江已作蠅頭書手抄徐松龕瀛環志略一通而萬國輿地圖海國圖志等書攤列案頭殆徧友人王伯廉贈有高談瀛海君忘倦之句紀實也賦性凝重似不長言語者嘗爲生徒講論語剛毅木訥章環顧諸子而謂之曰某也剛某也毅自稱近訥又宰我問孝章至子生三年然後免於父母之懷句潛然泣下不能仰視蓋是時母喪未除觸文生情如孺子慕恍見臬魚氏風木興悲當年未幾成進士官遊中州大吏重

其廉謹委辦鄭工賑務充丁酉科河南鄉試收卷官己丑科河南鄉試同考官差峻褒獎有加拳亂起畿豎狂燄熏灼仇教民如不共戴天錦江寓書友人某謂義和團肇事恐不能了事深識遠見類如此嗣丁父艱回籍主講洛陽書院教授一如囊日服闋再赴汴署輝縣補蘭儀兼理蘭封任事未久皆有惠政在蘭革稅契陋規蘭人悅剗石紀事稱道弗衰旋以驛馬故被誣罷職蘭人惋惜無如何也及復職蘭人焚香遠迎懼呼達境外錦江素澹榮利時念繼慈春秋高而弱弟喪逝猶子在抱鬱積患便血症於是引疾歸家居廿餘載民國十五年秋卒年七十有九錦江宅面郊負郭日常讀書課農累月不入城市摯友至則話星宿說海內外宗教派別如指掌未聞誇耀在官時得意語不識者未審爲倦遊里居之紳耆也王伯廉同心錄贊曰楊子酉渾金璞玉嗚呼可風也已著有教派圖說等書藏於家

文學

學問之道無窮其變遷也亦無定前人之學限於一國動云四海之外存而不論今則範圍擴大非合全球之學一爐而冶不足以爲學矣且前人之學非不高深立一

論著一說文采風流舉世靡然從之乃未幾有疑之者矣未幾有攻之者矣又未幾而一敗塗地而其學不足復存矣亦有滅絕既久百世而下有人焉拾其墜緒拓充而光大之而壁壘爲之一新者卽今日之鴻生鉅儒學貫中西議論則前無千古文章則獨闢一途舉世之人莫不震而駭之以爲古今絕學吾恐數十年後或數百年後復有鴻生鉅儒者出疑之攻之拔趙幟而立漢幟而其議論文章有爲今人所夢想不到者此亦必然之趨勢也然則成住壞空學問之循環亦依此例而行所以謂其無窮而無定也雖然此就其廣義言之耳若就其狹義言之則一詩一詞之著作莫非文也一名一物之考據莫非學也天資學力之所至果能自成一家言而其人亦可以不朽所患者人不知學學人亦不知學時髦衣冠駟僮肺腸徵逐醉飽之外無所聞問到處皆原伯魯此則社會之隱憂耳况若輩又不止徵逐醉飽已乎

東漢

捕巡字升臺鉅鹿廣宗人

齊志無

按捕巡名字籍貫見泰山都尉孔宙碑宙後漢書作佻爲宣尼十九世孫褒融之

父也碑稱其天姿醇嘏齊聖達道治嚴氏春秋舉孝廉躬忠恕以及人兼禹湯之非已然則宙固東漢之碩儒也巡爲其入室門生人品學問不可想見哉或曰傳者傳也所以傳示後人也巡之事實一無所稱述何傳之名余曰史記仲尼弟子列傳冉季以下凡四十二人皆一無稱述者也或併籍貫而亦無之太史公概名爲傳此史家之老例也何獨疑於捕巡乎

唐

蓋文達冀州信都人博涉經史尤明三傳其宗人文懿亦以儒業知名當時稱爲二蓋焉文懿者貝州宗城人也武德初歷國子助教高宗別於秘書省置學教授王公之子時以文懿爲博士文懿嘗開講毛詩發題公卿咸萃更相問難文懿發揚風雅甚得詩人之致貞觀中卒於國子博士

舊唐書蓋文達傳

蓋文達文懿皆當時大儒

新唐書王恭傳

宋

范杲字師回范質之兄子也父正青州從事杲少孤質視如己子刻志於學與姑臧李均汾陽郭昱齊名爲文深僻難曉後生多慕效之以蔭補太廟齋郎再遷國子四

門博士嘗携文謁陶穀竄儀成大稱賞謂杲曰若舉進士當待汝以甲科及秋試有上書言閔閱之家不當與寒士爭科第杲遂不應舉稍遷著作佐郎出爲許鄧二州從事坐事免太平興國初直史館歷右拾遺左補闕雍熙二年同知貢舉俄上書自言其才比東方朔求顯用以觀其効太宗壯之擢知制誥杲家貧貸人錢數百萬母兄晞性嗇嘗爲興元少尹居京兆殖貨鉅萬親故有自長安來者給杲曰少尹不復靳財物已揮金無算矣杲聞之喜因上言兄老求典京兆以便養太宗從其請改工部郎中罷知制誥杲既至而晞吝如故且嘗以不法事干公府杲大悔移知壽州上言家世史官願秉直筆成國朝大典召爲史館修撰未幾太宗飛白書玉堂以賜翰林杲又上玉堂記因請備職卒年五十六子坦亦登進士

宋史范
質傳附

按宋史柳開傳五代文格淺弱開幕韓愈柳宗元爲文因名肖愈字紹元既而改名字以爲能開聖道之塗也范杲好古學大重開文世稱爲柳范據此則開幕韓柳其文必似韓柳杲重開文必重韓柳之文而其所作之文去韓柳亦必不相遠韓柳之文無所謂深僻無所謂難曉而杲之文顧獨深僻難曉乎不似韓柳而似

樊宗師竊所不敢信也

程秘字懷古徽州休寧人紹熙四年進士歷官吏部尙書封新安郡侯以端明殿學士致仕卒年七十有九特進少師然世系本河北洺川自號洺水遺民十歲咏冰卽有莫言此物渾無用曾向潯沲渡漢兵之句舅氏黃寺丞知非常兒挾以自隨以平生所得二吳之學及有聞於程大昌者悉以付之由鄉荐試南宮時丞相趙公典舉見其文曰天下奇才也擢魁多士或以道學相猜置本經第二論者莫不稱抑著有洺水集二十六卷其外遺逸尙多先輩稱其宗歐蘇而長於文章洵哉

節宋史本傳
毛晉所作別

傳舊
志無

按四庫全書簡明目錄云程秘詩詞皆不甚工奏議則利害得失指畫井然蓋所長在彼不在此也據此則秘固政治家也文字工拙可以弗論况其文字又卓然可傳乎

明

韓定正統初以善書入翰林授鴻臚寺序班累遷太僕寺少卿修續資治通鑑成加

從三品俸世襲錦衣千戶

舊志

高登雲字君霞十三歲補博士弟子員八上棘闈未售遂肆力於古文辭晚工詩與弟凌雲聯翩競爽時目爲洛川二龍著作甚富有鷓鴣秣陵等集及論語百篇詩讀史諸詩行於世

舊志

清

孫丕猷字方壺形癯神健雅好臨池後以多病謝客除翻書臨帖外則伏枕吟詩別無事焉邑之博雅無出其右者以歲貢除山東肥城縣知縣未抵任而卒

廣平府志

張璞字圃仙生平疎脫曠達不拘細節博學多聞長於吟咏崖岸不立邊幅不修衣冠垢敝晏如也酷嗜歷代古器凡堪把玩者不惜重貲以購之終日撫摩不忍釋手方之元章之拜奇石不是過也以歲貢官南宮教諭晚年優游林泉詩酒自怡

舊志

王建衡字子猷號任庵一號月蘿康熙中拔貢官昌黎教諭著述宏富百餘年來遺稿散失可見者猶十餘種曰太極圖說曰四書參注曰讀史辨惑曰任庵詩全集曰王氏家訓曰異聞錄曰洛陽雜俎曰洛陽遺稿曰性理辨義此書分原理原氣原天

原生物原性原命原道原德原倫原學原鬼神原人鬼原咎原妖厲等目持論大抵根據宋儒惟原天等篇則以泰西學說爲宗建衛生閉關時代深通歐洲學術如此其博可知矣聞少時殊豪爽憤世俗齷齪常獨携一犬飲市中有希臘安得臣風味後乃仰屋梁偈偈日以著書爲事卒成名儒聞其撰杖之鄉至今士大夫猶樂道其軼事不已也

節十笏園
燕文集

和淦字禱舟生有異稟弱歲爲諸生及長由拔貢領鄉荐六上春官不第而文莫於學弗衰繼以舉人大挑題補江西峽江縣在峽凡六年政清民和暇則與諸知名士爲雅游飲酒賦詩相歡咲諸百姓亦坳堵聚觀賢令尹言談風裁以爲樂性寬和奴僕有過輒置不問人怪之曰陶靖節有言此亦人子也忍虐之乎卒年六十六凡四娶子五女六適某姓者尤工詩能傳乃父之學淦所著有禱舟詩稿駢體文集西江宦遊草共若干卷

節十笏園
燕文集

張家聲字丕振乾隆丙午歲貢家貧未能專業帶經而耘暇則披覽羣書學問淹貫絕意功名肆力於古文邑中碑表多出其手

廣平府志

張式璘字玉亭乾隆四十四年副榜學問優長鄉試七荐不售父得沈寢疾乃絕意科舉筆耕奉養後任撫寧縣教諭同上

李如契字薪傳乾隆己酉科拔貢文名噪一時善啓迪後進晚歲落拓館於山左卒困秋賦賚志以歿論者惜之上全

王春字文煥嘉慶辛酉由拔貢舉於鄉學問深醇與人交謙退和易至討論道德文章源流得失則意氣慷慨激昂口如懸河又篤於孝友鄉邦至今矜式上全

趙瓊字含輝道光元年經魁事繼母以孝稱居恒非義不取一時賢豪多從之游著有文集二卷行世上全

陶瀛洲字亦環道光乙酉拔貢本科舉人博極羣書爲文深刻奧衍學子不能遽解及深咀而細玩之始知其妙義之無窮也凡充南宮曲周肥鄉邯鄲及山西安邑五縣院長計其終身大抵在教育界中著有讀易存稿間吟偶存二書蓋經學而兼詞章者也

王步瀛廩膳生性耿介不與世浮沈生平義利二字辨之尤嚴授徒五十餘年以立

行爲先來學者不計脩脯勤於提撕遇有疑義指示一二語意旨豁如奇說異聞罔

能搖動有古狷者風

廣平府志

趙廷輝字殿颺道光己亥舉人自奉儉約待人誠篤研究周易著有周易注釋四子書多所領悟著有四書集解

府志

翟洛梧字棲鳳咸豐乙卯舉人家居授徒肆力於學每讀經諸生環侍口講指畫聽者相悅以解性孝友持身恭儉接物謙冲使人之意也消

全上

張扶陽字赤霞少年任俠嘗自鑄一私印曰血性男子詩學昌谷著有若葦堂詩草其警句云樹根秋鬼唱碑頂老泉鳴古寺寒松黑荒林鬼火紅皆可誦也卒年二十九歲其夭折亦與昌谷相若

鄉土志

張琛字納淮性端慤寡言笑又短舌語多模糊不可辨然工詩著有蜀葵堂詩草語新而幽如云叫鷓枯桑樹雞鳴荒草村一僧歸古寺萬葉走斜陽村空獨自過月毀有誰看性拙偏能笛家貧難舉觴遠寺鐘聲啞荒墳鬼語寒皆名聯也卒年二十有

五

鄉土志

徐光楣字顯堂晉溪明經之子也美顏儀有璧人之目能詩工琴善畫青碧山水得石田家法有時爲遠水平橋空林黃葉神韻蕭然則又似倪元鎮圍棋亦稱國手一時可與對枰者廣宗褚子穆孝廉一人而已餘非其敵也好藝菊每涼秋九月黃花開時則折柬招友人作真率會酒闌彈琴爲瀟湘夜雨之曲聽者爲之意遠座客王以鏗卽席賦詩云畫閣深堂悄無語琴韻錚錚襟秋雨瀟湘雲水見高情四座衣裳忽然古誰其彈者城北徐風貌翩翩玉不如一曲兩曲聲未終頰上酒潮珊瑚紅其風流可想見也惜不善治生家日以落年未三十抑鬱而卒著有媚秋主人吟草數卷

民國

高中杰字子木學術湛深文字淵美其味醇醇然讀之似廬陵家數前清光緒己卯臨清任西坪以名進士爲吾威院長決其是科必爲畿輔解首然竟不售立品極端自奉極艱苦終年不食一肉每飯煮米一鑊蔬菜或有或無非所計布衣終身又好著駝樣褐襪履皆自作見之者以爲村農不知其碩儒也變法以還曲士墨守遺編

不知變通且視新學如仇讐中杰則獨窺幾先以時務提倡後學於是而人以為新
民國肇造奢風大熾青年時髦革履絲鏡衣必舶來之毛織品一若非此不足以爲
士類者謹厚者亦復爲之而中杰之粗服惡衣如故也於是而人又以為舊卒年六
十三歲著有讀詩偶識輿地歌歷代帝王歌清代紀略遂生圖文鈔藏於家

節楚碧
堂文

李炳焱字藜閣年少才雋清宣統己酉拔貢畢業於北洋法政學堂故精法家言且
工詩其詩輕倩有致激潔無坊狀景瑣而幽述情哀以豔近體多與姚武功相似書
法亦韶秀如其詩人多愛之丁巳六月于役津門酷暑鑠金歸而致疾疾猶不至於
死以誤服庸醫之藥遂以不起蓋不死於疾而死於醫也一呬之藥榘我天民豈不
惜哉時年三十二歲

張廣榮字偃南諸生也所居室僅一間許日蹲踞土炕上以敝風箱爲几讀書抄書
口沫手胝左右兒啼女號跳突鬪撲於其側不顧也以故沈酣六籍逍遙百氏於學
無所不窺其友王以鈔贈之以詩有云其貌黑而津其學遠而大又云班管親抄南
北史六朝風味在胸中其人可想見也性和粹好滑稽每與同人雅集酒酣以往談

鋒犀利諶而不虐四座爲之軒渠然絕口不言人過與之處者終身不聞有詬訾語
無論耕氓野儒販夫走卒無不頌張先生君子哉年垂四十忽投筆從戎以馬醫畢
業爲馬醫官白狼之亂馳驅於秦豫皖鄂諸省狼禍之熾與有力焉王子春督鄂深
器之民國五年授二等獸醫正七年兼充湖北軍馬總稽查八年冬以疾卒於武昌
差次年僅五十三歲著有沾沾堂詩集詩餘坵之靡不才華橫飛語妙天下也

集

楚碧
堂文

王元一字復初同治癸酉十一名舉人大挑二等官饒陽教諭者二十餘年饒之知
名士如常育璋輩皆其入室弟子也大計舉卓異改官福建平和縣知縣其考語爲
通達政體兼精算學八字履任未久適值閩中變亂子女相繼喪亡遂掛冠歸則
破屋三楹殘書一篋無僕無婢日與其夫人相對愁嘆而已卒年七十歲平生著作
散失所存者惟庚子社會史游閩草饒風土志而已

武功

驕將悍帥毀綱裂紀政府仰其鼻息國人莫敢誰何武誠武矣吾實不願見之也然

而戡亂禦侮又必須武勇之人剛果之氣始克奏功焉蜀無關張漢火安能復熾唐無褒鄂李花何以遽榮此肅賈興歌所以美武夫之赳赳毋野誓衆所以昂夫子以桓桓也今者遍地萑苻到處猖獗綁票勒贖破產敗家甚或焚殺淫掠動輒數十村蓋自共和成立民不聊生者十餘年矣當路勦撫兼施而猶慮兵力之薄弱也乃催辦保衛團以厚其勢保衛團之組織有團總稽查隊長諸名目充此選者亦必須武勇之人剛果之氣而又有軍事知識始克保障鄉里對桑梓而無愧也昔吾有先正若潘郭石劉諸人者吾蓋嚮往深之矣

魏

潘永基字紹業廣宗人父靈虬中書侍郎永基性通率輕財好施以威烈將軍轉西碛石戍主治陳留南梁二郡事頗有威惠累遷虎賁中郎將出持節平北將軍冀州防城都督長樂太守葛榮攻信都永基與刺史元孚同心戮力晝夜防拒外無軍援內乏糧儲從春至冬力窮乃陷榮欲害孚永基請以身代孚死永安二年除潁川太守遷鎮東將軍東徐州刺史時蕭衍將曹世宗馬洪武等率衆來寇永基出討破之

永熙中遷車騎將軍尋加衛大將軍復除東徐州刺史前後在州爲吏民所樂代還京師元象初卒年五十六贈驃騎大將軍尚書右僕射司徒公冀州刺史

魏書本傳

按永基之守冀州城陷被執與元孚爭死於友義矣功於何有不知此正所謂功也當時孤城坐守敵以全力撲我我以全力拒之曠日持久敵師老矣而環境城堡籍得從容完聚有備無患敵人聞之亦必將知難而退其所保全者不已多乎非功而何且外無援軍內乏糧儲從春及冬無間晝夜此與睢陽城之羅雀掘鼠何異雖有賁育徒呼奈何而已故睢陽之失敗不能爲張巡咎冀州之陷落亦不能爲永基罪也成敗論人英雄之飲泣也久矣史臣之言曰拔萃從宦其知我永基哉

潘樂字相貴廣寧石門人也本廣宗大族魏世分鎮北邊因家焉父永有技藝襲爵廣宗男樂初生有一雀止其母左肩占者咸言富貴之徵因名相貴後始爲字及長寬厚有胆略初歸葛榮榮敗隨爾朱榮爲別將討元顥以功封敷城縣男齊神武出牧晉州引樂爲鎮城都將後從破爾朱兆於廣阿進爵廣宗縣伯又從破周師於河

陰議欲追之令追者在西不願者東唯樂與劉豐居西神武善之以衆之不同而止
改封金門郡公文宣嗣事鎮河陽破西將楊標等齊受禪樂進璽綬進封河東郡王
遷司徒周文東至崤陝遣其行臺侯莫陳崇齊子嶺趨軹關儀同楊標從鼓鐘道出
建州陷孤公戍詔樂總大衆禦之樂晝夜兼行至長子遣儀同韓永興從建州西趨
崇崇遂遁又爲南道大都督討侯景樂發石鰲南度百餘里至梁涇州涇州舊在石
梁侯景改爲淮州樂獲其地仍立涇州又克安州之地除瀛州刺史天保六年薨於
懸瓠贈太師大司馬尙書令子子晃嗣諸將子弟率多驕縱子晃沈密謹愆以清靖
自居尙公主拜駙馬都尉武平未爲幽州道行臺右僕射幽州刺史周師將入鄴子
晃率突騎數萬赴援至博陵知鄴不守詣冀州降周授上開府隋大業初卒

節北史本傳

宋

郭密貝州經城人軀幹雄偉膂力絕人幼孤隨母適同郡王乙因冒姓王氏以知瀛
州馬仁瑀荐隸首王帳下給事左右太宗卽位補指揮使復姓郭氏至淳化間凡八
遷移貝州駐泊兵馬部署會夏人寇邊以密有武略擢領安州觀察使充靈州兵馬

都部署訓練士卒號令嚴肅夏人畏服邊境賴以寧謐至道二年卒年五十八贈保

順軍節度

宋史本傳

按郭密幼孤隨母適人與范文正公仲淹同其遭遇乃知家庭不幸雖名將相亦不免焉密觀察靈州夏人畏服他日仲淹經略環慶夏人呼爲龍圖老子而不敢犯境其事又相同夫繼遷元昊皆一世之雄豈易制服者而兩人乃能使之畏使之有所不敢蓋有以懾其氣矣厥功偉哉前清袁枚隨園隨筆乃謂郭密李斌等全無事業又無關係何必立傳吾不知其謂事業者是何事業所謂關係者又何關係也

元

石高山德興府人父呼嚕古

原作忽魯虎

以侍衛軍從太祖定中原太宗賜以東昌廣平

四十餘戶遂徙居廣平之洛水中統三年高山因平章塔齊爾入見世祖因奏曰在

昔太祖皇帝所集安札爾博囉庫爾特依博囉漢巴圖庫庫布哈五部默齊軍

按元史兵

志中統三年三月詔眞定彰德邢州洛磁東平大名平陽太原衛輝懷孟等路各處有舊屬按札兒李羅笑乃解關關不花不里合拔都兒等官所管探馬赤軍按札爾

卽安札爾一作按察兒字羅卽博囉漢巴圖又笑乃解卽庫爾特依一作窟里台圖闕不花卽庫庫布哈不里合拔都兒卽博囉漢巴圖又笑乃解一作宵乃台譯言無定字也

金亡後散居牧地多有入民籍者國家土宇未一宜加招集以備驅策帝大悅四年授管庫總管鎮息州軍令嚴肅寇不敢窺居四年邊境晏然賜金等以獎之至元八年從取光州克棗陽進攻襄樊皆有功十年從阿木略地淮上十一年從下江南以功升顯武將軍十二年從伯顏至焦山與宋將孫虎臣張世傑轉戰百餘里殺獲甚多以功賜金虎符進信武將軍宋平伯顏朝京師帝問有瘦而善戰者朕忘其名伯顏以高山對且盛稱其功帝卽召見命自擇一大郡以佚老而以所部軍俾其子領之高山辭曰臣筋力尙壯猶能爲國馳驅豈敢爲自安計帝從之進顯武將軍十六年命領三衛軍戍和林因屯田以給軍儲歲不乏用乃顏叛督戰有功賜三珠虎符大德七年卒於家年七十六

節元史本傳

按錢辛楣養新錄云元太宗六年以胡土虎那顏爲中州斷事官七年遣皇子曲出及胡土虎伐宋胡土虎又作忽都見鐵邁赤傳又作忽都虎見食貨志又作忽篤華見石抹明安傳按明安傳次子忽篤華太宗時爲金紫光祿大夫燕京等處

行尙書省事兼蒙古漢軍都元帥不云爲中州斷事官者史之脫漏也石抹氏自明安至咸得不相繼爲燕京行省胡土虎蓋承其兄職及金亡之後又令斷事中州括中原人戶當在其時矣石高山傳云父忽魯虎從太祖定中原太宗賜以東昌廣平四十餘戶而食貨志忽都虎官人壬子年查認過廣平等處四千戶似卽一人豈石高山卽石抹明安之裔史誤認石抹氏爲石氏耶

劉全洛水人從世祖入蜀數立戰功封元帥

舊志載
輔通志

劉恩字仁甫洛州洛水人後徙威州父辛歸國署貝州長恩幼知讀書勇而有謀以材武隸軍籍累功爲百戶俄遷管軍總管佩銀符從入蜀數有戰功宋劉整將兵守瀘州中統三年都元帥紐璘遣恩諭整降以功易賜金符至元三年宋將以戰船五百艘載甲士三萬人夾江上游先以一萬人據雲頂山欲取漢州恩率千人渡江與戰殺其將二人士卒三千餘人溺死者不可勝計授成都路管軍副萬戶六年從平章賽典赤攻嘉定過九頂山與宋軍遇生擒其部將十八人械送京師賞賚甚厚九年從皇子西平王行省也速帶兒征建都恩將游兵爲先鋒一日三戰皆捷建都兵

夜來犯圍恩禦之死者千餘人時師久駐食且盡恩畫策招諭沿江諸蠻得糧三萬石牛羊二萬頭士氣益振建都因山爲城山有七巔恩奪其五斷其汲道建都窮蹙乃降入朝升管軍萬戶戊眉州十二年咎萬壽以嘉定降恩移戍嘉定安西王遣使召恩至六盤山問曰江南已平四川未下奈何恩曰若以重臣之不徇私者奉詔督責之則半年可下矣王卽遣恩與府僚木兒赤乘傳以聞帝以爲然命丞相不花等行樞密院於西川授恩同僉院事十五年重慶降守將張萬走夔府以兵固守不花遣恩招之萬以城降旬月之間得其大小州邑六十四六年入朝賞賚有加授四川道宣慰使改副都元帥率蒙古漢軍萬人征幹端進都元帥賜宿烈孫皮衣一錦衣一及弓刀諸物二十二年僉行樞密院事卒子德祿襲成都管軍萬戶

節元史本傳

明

冀英永樂間以軍功歷陞後軍督府

舊志

竇興洪武間以軍功任龍驤衛前所副千戶永樂間調金吾左衛中所帶俸歸里

同上

按冀竇二人之武功絕不叙其事實但以軍功二字了之官階而外一無所稱述

固不辭費矣母乃太簡乎夫武人之長槍大劍立功疆場必借文人之毛錐寫其精神而後永垂於不朽試觀項王鉅鹿之戰功誠偉矣有太史公一傳千載而下讀之者猶爲目眩神駭梁韋叡合肥之戰昌義之戰鍾離之戰得姚思廉一枝筆遂使兩人之鬚眉凜凜如生文章之能力一至如此所以古之將帥其蓮花幕中往往不惜重金延攬名流凡以爲身後計也冀竄二人以寒微而躋通顯意必有殊功偉烈固不待言而其傳乃寥寥如此意者陳壽索米而不得故惜墨如金靳其一篇佳傳也抑或江郎才盡筆不生花不得不爲曳白之秀才也二者必居一於此矣

清

柴連元字捷三乾隆癸卯科武舉性耿介非義不取家貧甚至於饗殮不給乃投鎮標營效力練習弓馬材武絕人及隨徵川楚屢立戰功保舉巴圖魯名號漸升守備都司歷任古北口密雲磁州陝西河州等營皆以廉幹果毅著稱滑縣教匪新疆張格爾湖南趙金龍之亂無役不從積功升至游府楊忠武遇春督陝甘時以連元舊

屬稔知其賢特授爲固原提標馬監營游府道光庚寅省墓歸里時年已七十猶能飛身上馬射必中的聆其言論風采猶覺颯爽逼人也後護理寧靜營副將告休歸里

按連元舊爲廣宗荆家寨人其五世祖名守志者自明崇禎時遷於吾邑北關遂爲威縣人從軍以還隸楊忠武部下忠武多裨人稱爲楊鬚子故仁和馬秋藥有楊鬚子歌膾炙人口連元亦多裨人稱爲柴鬚子迄今近百年而當時戰績吾邑父老猶時時樂道之而青史之名乃遠不及忠武者則亦以無人表彰故耳連元生於乾隆二十七年卒於道光十七年壽七十六歲暮年家居有故所乘戰馬牧於城外荒塹中其齒長矣瘦骨撐風臥不能起然每聞有火銃聲輒奮鬣驕嘶如臨大敵云

李懷興字可亭同治二年由武童投効陝西將軍多隆阿部下蹋毀羌白鎮王閣村逆巢旋又攻蒼頭鎮十三村蘇家溝長蛇灣一帶匪巢蒙保把總是年十月以克復盤屋保千總加守備銜四年請假回籍復由黃州府投入英字營赴甘助勦回匪以

截擊偃河大股逆河防解嚴將軍金順奏保游擊十年以參將歸山東撫標賞勉勇巴圖魯名號光緒二年管帶英字前營攻克輯懷城烏魯木齊昌吉呼圖壁遂以提督記名請旨簡放并賞換訥恩登額巴圖魯名號二年賞頭品頂帶十年在營病故奏旨從優議卹

黃銘新字永鑑父勤精技擊馳名都門銘新幼習槍棒盡得其父之術少長游魯豫間授徒千餘人是時捻匪起豫皖之交勢張甚適有荐銘新於端午橋制府者蒙委充甲字中營管帶追勦巨匪迭獲勝仗歷保都守等職後隨湖北按察使劉策先赴鄂委管湖北水師營繼因轉運糧餉出力遞保至協鎮奏留湖北候補張文襄督鄂時慮吾國固有之拳術寢失真傳遂委充湖北全省總教習以期練成勁旅籍保國粹以禦外侮也乃爲時未久竟以疾卒葬於武昌城外之馬家莊子鎮磐今爲廣東高等檢察廳廳長

柴永圖字維懷副將連元之從孫也果勇多謀有將家風少在河南撫署帶領衛隊以功保舉五品藍翎儘先把總繼以勦匪出力撫軍鄭松峯保舉守備銜四品花翎

旋以事告假歸里時在咸豐末葉白蓮教匪蜂起連陷曲周清河諸城威縣人情洶
洶一夕數驚邑中官紳以永圖知兵事公舉帶領本城練勇以武生王元勳副之十
一年四月一日教匪萬餘雲屯城外永圖竭力防禦日暮解圍去永圖又出城追之
數里不及而還至初五日復來四面攻擊喊聲雷動永圖直開門迎敵匪衆又披靡
而去計半月之中圍城者凡五次卒不得志乃悉竄去而危城賴以保全焉

鞏振翮由世襲雲騎尉於同治十年投入古北口提標練軍爲中營營官以勦馬賊
功授熱河參將歷任三年旋授蘆台武毅軍三十二營副將欽加頭品頂戴賞戴花
翎

王有字松泉章華村人年二十五投効淮軍於前清同治二年隨合肥李文忠克復
蘇台斬獲洪軍多名賞給六品軍功此其發軔之始也三年轉戰浙北嘉興一役首
先登城奪洪軍旗幟刀矛無算身受重創血漉漉滿衣甲四年克復宜興荆溪漂陽
常州諸郡縣調援江陰常熟無錫皆衝鋒陷陣力解重圍文忠公保賞花翎以千總
補用六年投効山東撫標健武營前敵差委七年春捻首張總愚擁衆數萬自晉而

豫直犯畿疆蹂定州陷饒陽朝廷震動有隨東撫丁宮保兼程入援一日夜行數百里轉戰雄任深祁高肅之交生擒擒匪數人首級累累掛馬鞍上皆滿而饒陽卒歸於我宮保奏保出力人員遂以守備歸直隸督標補用八年蒙直督湘鄉曾文正公委署通州協左營都司自是厥後海宇乂安辦理漕糧者凡六年光緒建元守備紫荊白石諸要隘十五年調補多倫都司賞加三品銜未及赴任卽告終養蓋烈士暮年雄心頽唐邊關蕭瑟不勝白雲親舍之感也十六年卒於家年五十二歲

忠烈

鄭玄云中心爲忠中心者實心也君主之世忠在一家共和之時忠於一國廣狹分焉公私判焉顧忠雖狹猶勝於朝秦暮楚之小夫忠雖私猶愈於欺君罔上之僉壬吾竊忠乎烈者火之猛也懸一忠以爲的知有死而不知有生其邁往直前之概如火燎原不可撲滅也然則忠者必烈乎曰是不然皇路清夷含和明廷此無所用其烈也談咲自若從容就義此藏烈於無形也亦有志堅膽脆如齊崔杼之弑莊公也陳不占將赴君難上車失軾御者曰怯如是去有益乎不占曰死君義也無勇私也

吾不以私害公遂往聞戰鬪之聲而死此一事也楚白公之難莊善辭其母將往死之比至公門三廢車中其僕曰子懼乎曰懼既懼何不返莊善曰懼者吾私也死義吾公也吾聞君子不以公害私及公門刎頸而死此又一事也凡此者皆忠而不烈者也然而烈者期於忠不烈者亦無歎於忠蓋不烈而烈也

清

鞏廷棟由武生官山東臨清州協鎮咸豐四年粵匪陷城廷棟巷戰而死朝廷賜卹祀昭忠祠中世襲雲騎尉

張重貌字山立道光十二年舉人官新河縣訓導同治初流寇陷城重貌衣冠坐明倫堂戟手罵不止遂遇害

劉維城武生也咸同之交流寇肆虐民不聊生維城聚數村之丁壯結團自衛是時新式快銃猶未發現於世所恃利器惟刀矛而已且刀矛亦未具多有荷木叉以列行間者民團之雛形如此同治二年十一月維城方列隊郊野教以步伐止齊而流寇萬餘騎風馳電掣而至團勇數百遂爲所包圍維城手持短刀罵賊不屈而死弟

維範年始二十與監生傅春光同行間亦同時殉難焉是役也死難者計一百二十八人屍橫遍野其姓名載殉難表中

劉心玉同治元年流寇至其村縛心玉令言村中誰有銀幣者曰均無之也寇怒痛笞之乃大呼曰吾村實無有銀之家笞我何爲我死不足惜所痛者我伯母以我爲嗣今年九十矣我死將誰依乎言已大哭寇曰孝子也釋之去其族人某失其名與伯父爲嗣寇至索銀幣辭無有將殺之伯母與本生母均出救寇將竝殺之某急呼曰惟吾知銀幣所在耳釋兩母卽出獻兩母旣釋婉辭以無寇曰爾孝子也且釋爾命旣寇又至村兩母均驚悸成疾勢難外逃乃僞爲己死也者院中設靈柩臥床覆衾令兩母泣守之卒以是得免焉

王超衆字東峯同治三年三月十九日流寇自馬橋敗竄將入其村超衆立村頭厲聲曰止止爾等孰非朝廷赤子國家何負於汝而作賊耶作賊者終必死身戮祖宗爲辱是亦不可以已乎吾村皆善良可急退勿相擾賊怒縛置路旁罵不休遂遇害按此人腦筋雖舊亦可謂不畏強禦者矣

申永錫字純嘏同治三年流寇至永錫執兵立街衢大呼鄉人共禦之繼見鄉人無應之者乃奮然獨往叱寇退不令入村寇鞭之乃與寇鬪因遇害

陶翰光性純篤事親孝同治二年流寇至父文登首率團兵與賊搏戰以百十鄉農與萬千狂寇決生死勢必不支翰光持兵護父免難已被重創賊去後遂死瀕危時猶大呼賊子敢傷吾父者再其弟翰春爲賊所執亦不屈而死

劉朋昭廉幹有爲爲鄉里所推重同治二年流寇張錫朱率衆萬餘勢張甚老幼相扶避難者沿路如麻朋昭恐其鄉之被侵掠也乃謀諸鄉人練團爲保衛村閭計時國家承平久民不知兵兼之變起倉猝逃亡者十室而九合所練勇僅百餘人規畫甫畢賊突至朋昭力單勢弱計不爲士卒倡終無以禦之遂身先衝鋒鏖戰移時卒以衆寡不敵而死時年三十餘事聞於朝以子自忠襲雲騎尉世職三世後以恩騎

尉永久無替

節十笏園
蕉文集

李福林同治三年隨苗軍効力保五品軍功後與賊在鄆城柳條圈村接戰陣亡勅贈武略騎尉

民國

田遇東字稼軒日本士官學校畢業辛亥之秋蜀被慘禍鄂舉義旗長沙九江同聲響應其時兩粵未下湘鄂仍危遇東適在桂林爲幹部校官焦勞憂思愈於儕輩陳說大義懇摯感人旋爲混成協第一營管帶官九月十七日廣西宣告獨立遇東實有力焉是時獨立之省計十有六遇東則大喜越二日宵後巡防第十四十五兩隊突爲變亂遇東時在藩署與王鐵珊軍統有所計畫聞變疾出欲以彈壓之而變兵伏狹巷中皆滿遇東猝不及防遂爲飛彈所中而死爲國人謀幸福福未得而先與禍會寧不悲與鐵珊聞之大哭厚卹其家繼卜葬於臨桂七星巖下與瞿忠宣公式相張忠烈公同儈兩祠相望毅魄英魂地下相逢定當歡迎也

段其濱字汀村幼懷大志畢業於保定軍械專門學校在第六鎮礮標充當連長目覩清政腐敗遂抱革命之宗旨宣統辛亥武昌起義清廷調兵南下其濱撥歸倪嗣冲指揮日見嗣冲殘忍常思刺殺之爲同胞洩恨迨與民軍開戰其濱礮皆虛發民軍之在大江南岸者始能得手嗣冲未能肆虐於江淮間者其濱之力也厥後雙方

構和已近一載而嗣冲始知其謀營副張運卿忌其濱才出己上又忌其素得士心百計謀除之均不得逞至是知嗣冲之銜之也遂共謀所以殺其濱者一日設筵於司令部招其濱往飲杯箸之間遽呼數健兒縛出刑場銃斃之其濱與其同志二人至死罵不絕口嗣冲密不宣布詭言段某請假歸里矣而月以後其兵士始有知之者哭泣數日不止

翁壽棠字蔭南畫宗徐青藤超逸有致前清光緒丁未高等警務官班畢業歸充本縣東區區官屢獲巨盜警道獎以奮勇敢果追捕盡力考語民國初元拿獲變兵出力又蒙記大功二次旋調西區突有悍匪百餘盤據郭固村郭固北區轄也壽棠不分畛域率兵助勦匪據村南之廢窰雙方快銃對放持一晝夜斃匪十餘人餘多負傷逃去是役也僉曰非翁區官之力不至此但匪踪詭秘往來飄忽或有以慎重之說進者壽棠慨然曰練勇以爲民也今匪勢猖獗若此誓不與匪俱生矣癸丑七月二十六日偵知孟李莊有匪潛伏急往捕之生擒八人其逸者皆匿他所伺壽棠歸乃由牆隙暗放快銃壽棠遂中彈而殞時年四十有三罔邑聞之無不痛悼者

節楊
袖海

所撰
墓表

楊藻春字芹香邑諸生也妙解音律尤善尺八每臨風獨奏其聲嗚嗚然如泣如訴如怨如慕聞之者忍酸不禁前清光緒丙午游學東瀛入其警監學堂者二年戊申歸國再充區官庚申歲大饑赤地數千里匪氛大熾藻春創辦民團以衛桑梓鄉里賴以稍安民國十一年縣知事周侯知其才武又以南區近盜窟特遴爲正巡官一月之間連獲陳好賢張玉柱張四張吉盛諸匪送縣銃斃十二年正月偵悉杆首董四陳清林潛伏曲周縣之北劉村乃乘夜黑督幹警突入縛之而歸搜獲快銃二枝外有物銅質狀甚詭異不知何物董四曰此新式電燈也藻春把玩在手意欲開看一震動間忽然炸裂飛彈四出藻春被數十創斷臂仆地登時殞命得年四十一歲有警士三人適在其旁亦同時殞焉

節墓表

孝義

宋史云冠冕百行莫大於孝範防百爲莫大於義先王興孝以教民厚民用不薄興義以教民睦民用不爭率天下而由孝義非履信思順之世乎旨哉斯言蓋必有良

好家庭而後有良好社會有良好社會而後有良好國家有良好國家而後有良好世界然則一門孝悌全家和樂其祥瑞遠勝於醴泉芝草十百孟子曰人人親其親長其長而天下平其是之謂乎

宋

李玘大名宗城人性篤孝力耕以事母母卒讓田與其弟堅遂廬於葬所晝夜號泣負土築墳高丈餘又以二代及諸族父母藁葬者盡禮築之凡三年成六墳皆丈餘不食肉衣帛不預人事皇皇然唯恐築之不及墳成復留守墳三年常令兄之子賣藥以自給年六十餘足未嘗入縣門鄉人目爲李孝子天禧中知府張知白以狀聞詔賜粟帛令府縣安存之里中有母在而析產者聞玘被旌兄弟慚懼復相率同居

宋史本傳

明

王榮字景春居父喪委頓苦塊間哀毀幾絕鄉里憫之持酒殺往慰曰毀不滅性禮也曷自苦爲榮給之曰我亦云然但吾所嗜惟天鵝肉耳願安得天鵝而食之乎榮

意以爲天鵝必不能致也少頃忽有天鵝墮雪中回旋不去衆愕然驚曰此非君誠孝所致耶取而供之然卒不食既葬疏食終身至今稱孝焉

節崔恭所撰墓表

宋璜邑諸生也正德六年瀛霸賊陷城縛璜父昇將殺之璜抱父請代死賊曳之不去遂遇害妻李氏時年二十二伏屍號泣曰夫死代父我死爲夫請并戮以從賊驚

嘆曰孝子節婦萃於一門矣遂去

舊志

馬如麟賦性忠孝遇事敢爲箴仕山西翼城縣典史升嵐縣巡檢以父偕年高歸養

戊寅滿洲兵破城與其子生員璠兆妻劉氏同死於難

同上

夏朝語母卒廬墓三年潘藩賜扁旌獎各道院賜扁給銀給穀知縣田大仁旌其門曰三年作苦隻手成墳庶幾虎鹿之孚委絕墜埏之穢卽遇陳太守豈得而貶損之

哉合此旌閭以回澆俗儒學王履亨贈廬墓歌

同上

賈前王字箸壽邑諸生其父官知州崇禎戊寅城陷前王奉父藏匿他室兵至索金前王給之曰吾父清白吏何處得金吾有金在某處盍往取之由是其父得免而前

王遂死於難

畿輔通志

王蓋臣字鼎鉉亦諸生家貧授徒養母及母歿日夜哀號泣盡繼之以血遂死

舊志

王夢賢邑諸生也祖父瘍生於足幾殆夢賢口吮其敗血復多方調治始獲痊母病夜不解衣蟲生禪中幾滿及母卒廬墓三年妻子不面按院表其門曰柏臺旌孝時其父猶在堂也以廬墓故不能雙方盡子職乃命子胤隆代奉菽水曲得歡心父娶繼母趙氏未逾年父卒夢賢亦廬墓三年按院吳表其門曰烏臺孝格後事繼母如生母繼母病篤夢賢禱神願以身代鄉人趙可大白之按院又表其門曰哀烈高風

同上

夏三戒三元三策兄弟三人也父母亡後三人共荷畚鍤築一高塚塚成三人俱廬於塚旁寢苦食粥三年不入村舍若需衣服柴米則與家人以鳴榔爲約家人聞榔聲卽送至三年之中亦不與人言語往來時人呼爲夏氏三孝子縣令聞之爲立三孝子碑碑在城南夏官營

同上

按舊志孝行志中尙有周浩一人書經二百五十年字迹漫漶不可辨認僅有姓名可識其事實數行概茫然也姑附於此以遵闕如之訓

清

李庭菴幼失怙恃依其叔父州倅公成立後其叔父殉戊寅之難有劣生欺其孤孀詐銀誣告庭菴代申冤抑時家奴輩乘機欲瓜分孤孀所有庭菴力制之使不得逞事平孤孀以田五十畝相酌固卻弗受邑人賢其行屢以耆賓舉年八十卒

志

王灝父允孚任蒙陰知縣勤勞致疾灝日夜悲泣割股療之莫能救既歿哀毀異常山東撫軍檄所司勒石表其事

沙克比字和占邑諸生父患痔延醫調治衣不解帶者累月治家有法一遵柏廬格言每歲終捐錢百餘緡以給貧乏不能度歲者乾隆壬子歲歉復大疫克比散米粟施棺木晚年有疾命取負券悉焚之至今鄉里稱誦之

沙孟元字占鰲邑增生幼貧兄弟三人友愛甚篤家計漸裕父曰汝叔父早亡遺孤隨母改適盍歸之以延其嗣孟元遂尋之歸併爲結婚授室視如手足父卒與叔子同居二十餘年田產均分一無所私鄉里賴其施濟者尤衆七十三歲卒

張洽字德溥邑諸生事繼母備盡色養先是與弟已析居後因其貧仍邀與共爨閉

戶讀書不預外事鄉人重之年七十四無疾而逝

李天一邑增生事親以孝聞友愛諸弟立義田規畫詳盡施藥療疾里閭德之晚年以書畫自娛壽八十卒同時又有貢生任世琅王居豐諸生張世臣亦皆以孝友著于作梅其母篤老行步艱難作梅奉侍左右晷刻不離數十年如一日又有諸生郭維藩者弟早卒待弟子如己出年八十餘卒

王守先上舍生也父失明而性嚴守先朝夕事之能得其歡心與弟同居怡怡無間言人咸稱之

徐和庭家貧而孝中年喪父運壁廬墓又好施與夏秋收穫之際遺秉滯穗貧民隨拾者所在皆是和庭率二子肩挑水手提器以待渴者而飲之每大雨雪道路消毀則日手一鍤填坎開徑以通行人歿後族人光宇爲之表墓同時有張可欽者父歿亦廬墓三年暇輒負土修墓可欽卒後人稱其墓爲孝子墳

張鳳翀字翹羽邑諸生幼孤事繼母孝繼母疾親侍湯藥未嘗解衣寢讀書課子貧而益堅長子康侯道光乙未舉於鄉官高陽教諭次子建侯歲貢生皆克繼家聲

張引源字脈長嘉慶癸酉拔貢事親以孝聞父母每告人曰有子如此吾心慰矣課徒五十餘年一方桃李盡出其門蓋一時之石師也

劉甲字鼎三父早歿事母三十餘年定省罔間母卒三年不入內室每食必祭事亡如存族黨稱孝焉子三人穎士雅士彬士皆諸生雅士光緒丙午考職二等以典史用

鄭杰少孤惟母是依母患末疾乃棄讀事親動必扶掖食必親視事兄克恭六十餘年無少間歲饑出粟以貸里鄰一時有善人之稱

羅家修極貧困之農家子也幼失怙奉寡母携兩弟兩妹借人室廬以居其伯父貴平居鋪上村以負販致小康家修往依之非後之也未幾貴平娶一孀婦携其前夫之女以來又生子女各一生計漸貧窘家修乃辭而歸爲人佃田弟妹亦漸長能操作又數年買田數十畝一家得飽煖焉然而弟未婚妹未嫁也家修又謀婚之嫁之婚嫁既畢兩弟乃視家修如眼中釘矣謂兄前既依伯父當仍歸伯父處家產與兄無與也家修顧甚喜謂兩弟曰家產於我無與娘不能與我無與也我不分家產我

分一娘足矣於是讓產於弟而奉母獨出仍佃人田以爲養親計無何母病癱瘓百治罔效自是不復爲人耕日在母前緝綿以以規蠅頭利凡母之飲食便溺起居睡眠梳髮著衣捕蚊捉蝨一輾轉一屈伸皆家修一人扶侍委頓床頭晷刻不敢離也或見母不怡則曰娘愛觀劇乎試聽我喉嚨何如於是振聲高唱忽而秦腔忽而秧歌忽而亂彈走場打諢一如劇場必使母歡咲而後已如此者四五年及母卒哭不成聲見者爲之隕涕當母病時家修曾借鄉人傅翁錢傅翁憫其窮敬其孝早焚其券矣傅翁歿後家修忽持京錢三緡詣傅家償債傅翁之從子某知其事曰吾伯父在時囑焚其券此債無庸還矣家修曰如此是使我借來生債他日爲牛爲馬以償之也吾豈爲之乎遂留其錢不顧而去

張存誠字閑邪讀書不事科舉慕曾子身體髮膚不敢毀傷之語事母至孝母卒喪葬如禮在墓傍築一小室居其中者三年素食布衣服闕然後歸家鄉人欽其孝思均以閑爺呼之

段長年字遐齡少貧寄居舅氏家嗣以酤酒致富事母侯氏以孝聞母卒事其繼母

王氏一如事其母者出告反面胥遵古禮事無巨細雖米鹽凌雜無不稟命而行侯氏八十三歲時忽冬月染疾思食鮮魚時水澤腹堅魚不易得長年百方尋覓務復失據一日池邊廟壁無故崩頽壓堅冰皆裂濺出紅鯉重一斤許長年大喜持歸與母烹食而病遂愈此事雅近王太保然不勞臥冰而魚自出人咸以爲孝德所感爲之扁表其門曰孝行可師侯氏九旬正壽長年演劇祝嘏頗極一時之盛越二年侯氏卒而長年亦壽至八十二歲

任高年字鶴齡仗劍從戎以積功官山東武城縣把總嗣又以勦防出力賞六品頂戴性善怒然事母孝每當盛怒之際或聞母策杖聲歎聲呼聲即裂眦衝冠之狀况無不變而爲悚惕態度以是人多擬之鱗設諸焉

李修己字安民納資爲國學生世父應魁無子而卒世母范氏子之愛如所生修己事其世母亦如生母焉晚年生子抱孫猶時作孩兒戲母撫掌笑曰瓜果餅餌盡在案上憑汝取去分給汝子汝孫也因之合家軒渠以爲萊子再見至母病篤時執修己手曰吾去矣吾含笑地下矣蓋修己之孝有以深慰之也又有趙立節者事母克

孝母病卒慟不欲生勺水不入口者數日竟以毀死

高慶昌字祥甫清同治丁卯舉人候選知縣爲棗強書院院長者凡十年多所成就弟慶熙邑諸生中年以後患狂易之疾逢人輒罵遇什物輒搗毀之其疾時斷時續前後幾二十年慶昌爲之百方醫治不效常放聲大哭引爲己疾或夜禱神廟中泥首佛座達旦不出鄉人見者莫不憐之其友愛如此晚年頗信因果喜讀太上感應篇往往稱述其言以警世居家訓婦女亦時引之考太上感應一書始見於宋史藝文志其大旨言天道福善禍淫與抱朴子所述玉鈴經相近蓋古籍之幸存者前清碩儒惠定宇俞蔭甫皆有所發明雖道家之書而實不悖乎儒家之旨也

張耿字文光讀書攻苦以法度自繩父患肺炎痰飲不絕耿無他兄弟晝則延醫調治夜則屏氣立於床側母病瘍連年備極人生之苦耿先意承旨備盡色養母若忘其病瘍者父母歿後大母王氏年九十矣而耿年亦衰暮朝夕侍奉有李令伯遺風大母亦怡然忘其高年耿卒時年八十有三

呂元利目不識之無父患痿疾幾十年元利晷刻不離每進食飲或湯藥如奉神明

遇村俗演劇或盲翁彈詞必負父往觀以博老人歡笑兄弟三人自以年齒居長理宜獨勞不責諸弟也知縣都林布表其門曰孝友堪欽年近六旬無子繼配周氏忽連舉二子卒年七十有八

宋偉邑諸生事繼母石以孝聞石生一子名學儒未婚而死石日夜悲泣以致喪明偉年十九日思所以解母憂者念弟已死不可復生倘得生媳日侍左右則母悲子之心移爲愛媳之心愛之心日濃則悲之心自淡後將由淡以至於無此或解憂之一道也然新婦安所得乎適有南宮胡氏女年十四歲皈依象教由於根性嘗願嫁一死夫以保清淨身偉告於母媒定而迎娶之母大喜女事姑如母賢孝之稱籍甚一鄉事詳列女傳中偉又善用財嘗出錢千緡立一義倉每至春間開倉振貧歲暮天寒必徧訪里中鰥寡孤獨窘困不能度歲者按戶出資給之光緒二十一年無疾而終

賀盤圖亦諸生也其父景雲患痢疾醫藥罔效盤圖曰古人云人子不可不知醫信哉於是研究醫術獨精痢疾科當其父病時未嘗跬步離夜寢不解衣帶以未得病

源乃以鼻嗅其二便與庾黔婁之嘗糞有同情焉父疾愈後仍潛心醫學手不釋卷一時稱爲良醫

張步月字聘三幼喪母依乳母以生及長乃迎之於家飲食衣服事如生母終身不懈及乳母卒衣衾棺槨靡不從厚送諸其家而葬焉乳母雖在八母之列富家大族每以婢媪蓄之無加禮者合肥李襲侯仲彭待乳母東鄉艾氏極優世多稱其盛德步月則直視如生母天性可謂濃厚矣

劉純修字敏學文敏先生調贊之孫也兄弟四人以貧故析居純修佃田以耕漸致小康季弟家修歿遺子女各二皆幼純修曰藐藐諸孤將何依乎此吾之責也乃復與共居飲食教誨一身任之俟男婚女嫁以後又復與析居曰汝輩皆成年能自立矣吾亦可以對吾弟於地下矣平生尙任俠遇有不平事輒干涉之鄉里之不軌子弟望見輒避去已不讀書對於讀書之士備極恭謹無子愛弟子蓬萊立以爲後嘗撫蓬萊而言曰吾與汝無多希望汝志先文敏之志事先文敏之事而已爲人長軀方面目光炯炯射人有膂力善技擊年八十餘猶強健老拳一揮少年無不辟易

云

趙濟川少業農嘗以不讀書爲憾其弟溶川前已析居以貧故廢學濟川出其素積傾囊助之讀書溶川後爲邑諸生

曹元輔字偉卿優行廩生也游學京師爲景弗亭侍郎高弟試輒高等而獨困於秋賦士林惜之事親極孝處兄弟尤友于兄元詰性慍烈家人無敢拂其意者一日兄弟會食語言稍有齟齬輒以手批元輔之頰瓊笠墮地元輔笑拾之抖其塵自著頭上謂其兄曰兄力雖大吾帽自若兄無如吾帽何也俯食如故談笑亦如故無幾微怨怒意其敬兄大都類此

民國

紀懷寶字濟卿武孝廉祥泰之子也富而好行其德光緒庚子歲大饑出所藏粟百餘石設粥廠鳩形鵠面托鉢而來者日以數十百數懷寶家中十餘口男奔女炊終日擾擾飲食與貧民共壬寅大疫死者相望懷寶不知醫乃特聘醫士數人或住本村或分住各市鎮多備藥物奔走於病者之家活人無算平時遇有婚喪大故力不

能舉者所求罔不應處家庭以孝母患胃痛每發數月不愈羣醫束手嗣據某醫士云此年老胃氣不足所致也以十二齡之幼童口噓其臍其痛當止懷寶乃多覓幼童至於跪求其父母未幾疾果瘳既又患氣弱終於不治懷寶一慟幾絕咯血數斗猶復勉事其父跬步不離及父歿又復咯血不已哀毀骨立自是終以不起卒年五十九歲遠近稱爲紀孝子民國八年徐大總統褒以孝闕流芳扁額